

## Tabell 1-fk

### Rammetilskot til fylkeskommunane 2022

Rammetilskotet til fylkeskommunane blir løyvd over kap. 572, post 60–64 på statsbudsjettet. Samla rammetilskot er vist i kolonne 4 – *Sum rammetilskot 2022*.

Innbyggjartilskotet med utgiftsutjamninga er berekna ut ifrå talet på innbyggjarar per 1. juli 2021. Skatteutjamninga er òg ein del av rammetilskotet. Denne skjer gjennom budsjettåret, etter kvart som skatteinntektene ligg føre. I skatteutjamninga blir det nytta innbyggjartal per 1. januar 2022 og rammetilskotet til den einskilde fylkeskommune blir justert som ein del av skatteutjamninga. Den endelege skatteutjamninga er ikkje klar før i februar 2023 og er såleis ikkje med i berekninga av rammetilskotet i denne tabellen. Det endelege rammetilskotet blir difor klart først i februar 2023.

### Kolonne 1 – Innbyggjartilskot (post 60)

Kolonne 1 viser innbyggjartilskotet medrekna utgiftsutjamninga, tilskot med særskild fordeling og overgangsordninga for nytt inntektssystem i 2020 og nye saker i 2022. Sjå tabell 2-fk for meir detaljert dokumentasjon av innbyggjartilskotet.

### Kolonne 2 – Nord-Noreg-tilskot (post 62)

Nord-Noreg-tilskotet blir berekna som eit beløp per innbyggjar til fylkeskommunane i Nord-Noreg. Tilskotet er berekna ut ifrå talet på innbyggjarar per 1. januar 2021. Satsane er videreførte uendra frå 2021.

Fylkeskommune	Kroner per innbyggjar
Nordland	1 298
Troms og Finnmark	1 646

### Kolonne 3 – Skjønstilskot (post 64)

Kolonne 3 viser fordelinga av skjønstilskotet på 382 mill. kroner til fylkeskommunane for 2022. Departementet føreslår å fordele 332 mill. kroner i ei basisramme til fylkeskommunane, og å halde tilbake 50 mill. kroner innanfor skjønstilskotet til fylkeskommunane til ekstraordinære hendingar o.a. i løpet av budsjettåret (reservepott).

Departementet vurderer årleg storleiken på skjønstilskotet og fordelinga mellom fylkeskommunane. Ved fordeling av ramma for 2022 var det eit mål å jamne ut forskjellane mellom fylkeskommunane. Vidare tok departementet omsyn til fordelingsverknadene av innføringa av ein ny modell for å berekne fylkesvegkriteriet. Fylkeskommunar med den største reduksjonen per innbyggjar, som følgje av innføringa av den nye modellen, får eit eittårig moderat tillegg i skjønnsramma. Dette blir finansiert gjennom eit likt trekk per innbyggjar frå dei andre fylkeskommunane sine skjønnsrammer.

## **Kolonne 4 – Sum rammetilskot 2022**

Sum av kolonnane 1-3.